

Terenga 5: Hōtaka 34 – Te reremahi me te rerehāngū ka tīmata ki te 'Me'

He Mihi

Ki te kore te kaingaki e tārake i tana māra i ngā tarutaru, i ngā māheuheu, i ngā mauitī me uaua ka tupu kounga mai ngā hua. Waihoki te reo - ki te kore te kaikōrero e whakatika i ōna anō hapa, pakewa, tapepe hoki me uaua ka maringi te kounga o te kōrero. Nō reira haere mai, ki te hōtaka o Ako, kia ngaki tahi ai tātou i ngā māra o ō tātou reo

Hei Mahi Whakarongo

Mokori anō hoki kia mihiā a Raukatauri i te ātaahua o ngā kōrero i hopukina ai e rātou i roto i ngā hōtaka Whakataukī e rangona ai te rerehua o ngā whakaaro Māori e rere ana.

Anei ngā pātai hei whakautu mā koutou:

- 1) E rua ngā kupu hou kua whāngaihia e Te Heketū i roto i ana whakamārama, e whai ana i tētehi kupu e rite ana te tikanga. He aua kupu e rua?
- 2) He aha te ia o ana kupu akiaki ki tana tama?
- 3) E whakatauritehia ana te auheke ki te aha, i roto i tēnei whakataukī?

Kāti, kia whakarongo tātou ki a Leon Heketū Blake.

He Whakamārama

Tēnā tirohia ngā rerenga kōrero e rua e whai ake nei, ka whakaaro ai he aha te rerekētanga.

1. Me mahi i ō mahi kāinga.
2. Me mahi ō mahi kāinga.

He reremahi tētehi. He rerehāngū tētehi. Ko te tikanga o te kōrero, e rite ana. Kia wetehia e tātou.

Me mahi i ō mahi kāinga (REREMAHI)


1. Me + **tūmahī** + (kaimahi) + pūhono + **aronga**

Me mahi ō mahi kāinga (REREHĀNGŪ)

2. Me + **tūmahī hāngū** + (e + kaimahi) + **aronga**

He Mahi Ī-papa

Tuhia te 'M' ki te taha o ngā Reremahi. Tuhia te 'H' ki te taha o ngā Rerehāngū.



Hei Mahi

Panoniā ngā reremahi e whai ake nei kia rerehāngū ai te takoto:

1. Me whai tātou i te huarahi rā ki Te Teko.
2. Me tunu keke koutou.
3. Me ako i te reo hei oranga mōu.
4. Me whakatangi koe i tō tino waiata.

Whakautu:

- Mahi Īpapa: 1. H 2. H 3. M 4. M 5. M
1. Me whai e tātou te huarahi rā ki Te Teko.
 2. Me tunu e koutou he keke.
 3. Me ako (e koe) te reo hei oranga mōu.
 4. Me whakatangi e koe tō tino waiata.